

友

聲

集

待蘭軒存稿卷之上

沐陽王欽霖慈雨著 鴛湖王 相惜庵輯

雨後行華陽山中

一雨徧山翠眾峰成一峰隱約碧天外吐出青芙蓉不  
見上方寺縹緲聞仙鐘谿路忘近遠窈窕岩花紅流水  
自深淺幽谷無人蹤

春遊天台山欲訪鄧高士不果

抱琴偶獨往谿路滿蒼翠空谷幽蘭花寒香染衣袂欲  
尋餐霞人飛鳥白雲外峰回路忽轉林莽阻荒穢古壑  
不逢人素心有微會千岩坐沉寂天風送虛籟

待蘭軒存稿卷之上

覺生寺華嚴鐘歌

覺生寺內懸大鐘龍紋象紐高穹窿華嚴布滿萬千字  
精奇妙巧疑神工靖難功成定九鼎輝煌金碧開琳宮  
一時屠戮肆殘忍憑仗佛力爲銷融少師金帶壓朝貴  
鑄此藉以銘其功火師金母各焦爛煎熬欲罄豐山銅  
金繩十丈繫高閣聲聞百里如豐隆兜元國破曉雲裂  
鯨魚長嘯天爲聾我佛低眉亦厭聽煩冤萬鬼號秋穹  
古來王者貴仁愛徒知佞佛真愚蒙不畏民言畏神鬼  
成祖母乃非英雄黑孽茫茫慘不化天災懺悔應無從  
轉瞬銅缸覆高煦乃祖戾氣先爲鍾出來禍亂兆開國

直以殺運相始終滄桑以後鐘墮地幾年  
蘇蝕兼苔封  
長陵豐碑仆不起金鳧夜出魚燈紅殿上  
銅駝卧荆棘  
路旁石馬鳴悲風入室何人肆考擊  
金仙淚墮鉛花濃  
聖朝開國重儒教周宣石鼓羅河離此鐘  
屏棄置郊外  
梵音勿使湮

天聰君不見鐵象百尺造石虎金人十二誇祖龍  
暴主窮奢肆戾狠摩挲此物將毋同又不覓軒轅鑄鏡  
禹鑄鼎皆爲民物除奸凶苟非法物大何用不如爐火歸銷  
鎔我欲毀作金錢億萬貫博施一濟窮黎窮

雨中遊花之寺看海棠

梵天綠霧吹冥濛海棠著雨懸脂濃清晨縱轡出郊野  
尋春有約趨琳宮是時積陰天似水莓苔淨碧稀遊蹤  
葳蕤恰喜未全放嫩寒猶待晴霞烘嫣然一笑有餘媚  
銷魂絕代驚初逢有如玉如春曉破微醉睡餘雙頰生  
嬌紅又如飛燕新妝倦無力茜裙半鞞神惺忪天姿殊  
俗在清豔因知富麗難爲工我笑淵材實傖父無香抱  
恨殊矇矇豈識芬芳在格韻凡夫鼻觀安能通禪寮寂  
坐入幽賞但覺花氣馥郁吹晴空不須銀燭照深夜不  
必翠襲寒珠權興酣便欲卧花下不然走馬隨顛翁長  
安花事苦太晚一年春色尤匆匆山僧惜我看花早不

知情與殊難同連朝正喜斷熱客閒曹得趣宜閒中再  
遲十日花爛熳門前冠蓋多王公

長椿寺觀九蓮菩薩象

梵天縹緲慈雲遮天風吹墮青蓮花菩薩現身作女子  
曾經妙選來皇家皇家舊典傳官正內庭不許干朝政  
當時國柄付江陵安全一半由慈聖慈聖無殊古后賢  
儒臣啟沃重經筵膝前示訓先勤儉海宇清平四十年  
垂簾往事羞唐宋女中真可稱堯舜秉燭宵披帝鑑圖  
親蠶曉進幽風頌翰墨功深每自娛晉唐楷法間歐虞  
文華殿上盤龍額內監傳聞手自書春明瀛島迴鸞駕

賞花傳酒多清暇  
西城曲宴戒荒亡  
至尊詞色難相假  
晚年何意媚空王  
夢裏傳經事渺茫  
延禧祝壽都何益  
漫想身登選佛場  
拈香幾度游名利  
梅檀繚繞雲階滑  
佛髻親安白玉簪  
殿心猶峙黃金塔  
天章雲錦燦成堆  
萬佛袈裝其翦裁  
不落夾盛雲子飯  
波羅蜜供梵王齋  
禪寮金碧迷煙霧  
釋迦虛說天官富  
佛號齊宣功德山  
僧厨別貯金銀庫  
寶和六店貨連綿  
珠玉泥沙亦可憐  
祇園布滿三千界  
天府虛償億萬錢  
仁祠靈宇東西起  
官家助施慈顏喜  
娛親不憚竭民膏  
國家困敝都由此  
椒房恩重武清侯  
粉磴脂田禮數優  
借餉倉皇膺國難

此時菩薩亦須愁慈悲佛旨殊難喻外家身後猶偏護  
至今遺恨悼靈王忍心寬挈童孫去寇起神孫首被戕  
福藩殖醢亦堪傷誰知求福翻貽禍佞佛由來定不祥  
閑來佛閣瞻遺象慈容滿月殊無恙想見鬢陀妙色身  
龍姿鳳額天人相母儀天下共尊親冠帔何緣類應眞  
畫相豈應留佛寺彼時宰相是何人禪燈佛火供朝暮  
故宮手澤無尋處淒涼隆德殿西隅黃花開落菩提樹  
轉瞬恒河度劫塵觀空有眼漫生嗔蓮臺坐見滄桑換  
何用金剛不壞身

潭柘寺觀妙嚴公主拜瓢



香塵縹緲蓮臺空西歸隻履無留蹤誰立祇園布金地  
雙趺猶印苔花紅山僧爲我殷勤語精誠足證焚修苦  
有人膜拜意尤虔曾是皇元貴公主媿嬾天人字妙嚴  
天花夙世記曾拈有生早惜三塗濁不裹春雲玉筍尖  
掃除羅綺拋珠翠浮榮豈戀皇家貴看破鬢陀妙色身  
梵天紅灑珍珠淚尙主朝廷禮意崇粉侯妙選徧臣工  
無端謝絕吹簫客鳳去秦臺夜月空琳宮勅建雲深處  
瓣香頂禮無朝暮失足愁生慾海塵凌波肯學蓮花步  
玉趾盈盈一段春不教埋沒沅沙塵摩挲未惜頻稽首  
想見龍華會上人只今寶匣深深貯何年傳入深宮去

輒紅猶恐污芳蹤送歸時有慈雲護脂田粉磴散雲煙  
幻影空花在眼前解脫人天無限恨未妨立地便登僊  
可憐江左嬌羅韞空向珠帷弄新月傷心花落後庭春  
美人骨化音塵絕君不見唐家貴主玉真姬羽帔花冠  
出世奇欲嫁神仙作夫婿纏綿猶未斷情絲定慧何如  
赤雙跣皈依大士凡心死六根清淨一塵空愛水頰波  
飛不起玉軛幾代鎮禪林入指痕猶計寸深石火光中  
香不散千秋一片至誠心元皇家法吾無取甘心披剃  
隨嬌女帝師徒事八思巴皇姬忍受髡徒侮無怪荒淫  
末代孫合宮頂禮向空門嬋娟爭作天魔舞演迭奇方

祕至尊瓊樓月殿今何在酒缸異代千金買龍沙翠輦  
不歸來莫問當年青玉海草草山河社屋寒西山雲起  
思漫漫淒涼幸有遺軛在當作先朝故物看

趙忠毅公鐵如意歌

東林禍成喪士氣謹直尤推趙忠毅忠毅玩好無珍奇  
手澤惟留一如意如意非玉兼非金鑄以精鐵文黜深  
銘詞昭灼見肝膽皎然誰復知公心我獨摩挲三歎息  
如公風骨時無匹氣節文章重黨魁海內同聲頌高邑  
公爲臺諫已有聲奏黜宵小朝綱清西臺冷面似寒鐵  
指揮如意羣邪驚及爲吏部掌銓選閣黨叩門拒不見

鐵中錚錚有此人手把握君節不變冢宰執法無遷延  
肯爲墨吏圖矜全論贓首議戍呈秀從茲構禍遭株連  
顧魏左楊同削籍冤慘囚圍血狼藉此時如意當隨身  
唾壺擊碎天應泣不死翻教謫代州幾年人老塞垣秋

苔花繡澀生寒血天末蒼涼古戍樓公心耿耿真如鐵  
萬轉千回不可折至今觸手起寒芒一段清冰三尺雪

風稜不愧斬邪刀正氣自足除凶妖狐兔紛紛各破膽

五彪五虎俱藏逃

魏闕假子倪文煥吳淳夫等時號五彪五虎

誅奸可方擊

賊笏凜冽猶能駭毛骨當時恨不擊忠賢委鬼頭臚頻

殷棘滄桑變滅悲蟲沙何時收入賢王家

舊爲成邸所藏

廉夫

鐵笛坡鐵杖流傳何足相矜誇此鐵與公同不朽精氣  
猶堪觸牛斗堅剛那肯屈如鉤定知不入摸棱手鬼域  
千秋膽尙寒我聞風憲職除奸法曹公有題名在幾輩  
無慙鐵柱冠

遊慈仁寺觀窠變觀音像

我聞文殊菩薩隨地能示現千萬化身不可見欲從火  
宅度眾生慈容忽向官窠變變成瓦礫爲金仙珠冠綠  
帔殊莊嚴慈悲爲世憫苦惱支頤危坐如參禪觀空得  
象來何處陰陽爲炭神工鑄三十二相皆天然精奇不  
數劉鑿塑昔者帝釋遊天官梅檀雕像尤玲瓏刻畫縱

能備諸巧已經斧鑿非天工或謂寶象若圖寫恐非造  
化運爐冶豈知佛慧妙無端不見木菩提與竹尊者古  
來女皇稱聖神搏土猶作愚下人矧彼法力至廣大寸  
莖能作丈六之金身爲想妙容初化出紅雲一朵趺雙  
足圓光應觸燄摩天甘露難澆火地獄茫茫人海孽無  
邊蟻擾紅塵熱可憐誰解清涼散煩煥火中原可種青  
蓮山僧爲我談遺事相傳變自前明世當年頂禮在宮  
庭後來勅供慈仁寺寺松繚繞拂雲煙石碣猶書成化  
年祝釐豈出深宮意虛糜朝廷百萬錢有明中葉誇工  
作雕漆模銅各精絕仁廟以後磁貢繁敝金畫彩神光

奪內廷秘色多青蕉宣窰精彩輸成窰香泥廠前列萬  
炬燔肌炙體皆民膏幾處琳官輝日下綺寮秘閣都精  
雅忍將珠玉作泥沙黃金燒出琉璃瓦土木困敝兼民  
勞五行之變能爲妖佛如現身爲說法至今炯戒思前  
朝

書文信國與趙青山手書卷子

此卷爲毘陵章芝眉孝廉所藏李申耆太史刻  
於江陵按宋遺民錄云趙青山名文南宋末累  
舉進士不第與弟宗疆同往漳州依文信國至  
貧管鋪弟病不能前信國遣醫致幣手札相問

宋有鄧光薦跋文

章君手持一卷文云是文山丞相筆展觀字字飛龍蛇  
忠臣手跡終難秘遺民深愛趙青山風義文章重吉安  
間關遠赴勤王詔萬死相從亦大難蠻煙嶂雨嗟行路  
哀鴻徧野誰相顧病來弱弟更灰亡那堪回首篋簞鋪  
喪亂餘生忍告哀藥籠芝楮伴醫來貽書想見殷勤意  
國步艱難尙愛才軍書急遞烽煙起揮毫閑暇猶如此  
磨墨應煩玉帶生擘牋疑是澄心紙戎幕雄談不久留  
汀州遷徙又漳州山河只賸天南角莫問青原白鷺洲  
跋尾尤憐鄧中甫惓惓知公用心苦纏綿生死見交情



當與公書並千古

青霞怨

南城夜半火雲紫  
賊烽烈烈煙塵起  
君王披髮叫天闕  
美人揮淚願從死  
青霞室裏人如花  
碧玉芳齡初破瓜  
待年猶未識君面  
春深金屋藏嬌娃  
絳紗宛轉纏雙臂  
蜥蜴鮮紅發嬌媚  
金爐寒盡女兒香  
長門不解愁滋味  
蛾眉幾輩誇嬋娟  
月月分賜煙花錢  
羊車望幸豈無意  
妝成女伴空相憐  
君王宵旰憂蛾賊  
六官愁對傾城色  
辜負娉婷絕代人  
守官槐冷風蕭瑟  
呼號大內驚倉皇  
宮娥四出爭逃亡  
何人能守伯姬節  
青霞一炬明霞光

妾心耿耿霞光裏骨化香銷恨不已玉顏嬌小未承恩  
死報君王乃若此幽貞一室生餘輝芳魂應逐青霞飛  
巫陽下召意悲慘當隨帝子乘雲歸不然化作美人虹  
光芒射天猶萬丈少女風柔落萬花胭脂色變愁雲障  
吁嗟乎閹臣從賊何紛紛階前舞蹈迎新君追金日日  
受考掠可憐赴火徒自焚

玉河悲

九龍池畔花如雪淥水溶溶浸寒月精衛含冤似海深  
子規春盡猶嘯血蛾賊鳴張捲地來陰雲慘慘羃黃埃  
嬋娟誰惜傾城色憔悴瓊枝亦可哀魏氏娉婷好女子

潔身誓向重泉死皎皎如花二百人冰心一片明秋水  
曾記珠簾看水嬉笙歌盡舫日遲遲太平風物都消歇  
腸斷西宮夜宴時君王宵旰多憂悒青蛾皓齒無顏色  
淒涼紅葉御溝流芙蓉落盡秋蕭瑟蕭瑟蛾眉付劫塵  
可憐非復受恩身影娥池畔盈盈水嗚咽如悲絕代人  
西風太液滄波起渺渺香魂隔泉底海枯石爛恨難消  
銀潢一碧天如洗怨魄沈淪又百年故宮池沼尙留迹  
風裳月帔清秋夜管領荷花作水僊

春晚

江鄉春又晚愁思隔天涯細雨暗高閣孤鶯嘒落花閒

中愛岑寂客裏惜年華佳節清明近羈人倍憶家

夜過半山寺呈了緣上人

禪房春夜寂山月半窗明梅影水中瘦鶴聲煙外清僧  
高無俗韻境冷絕塵情爲愛岩棲者應知夢不驚

湘川阻雨

風緊岳陽樓湖波天際流瀟湘連夜雨雲水一蓬秋浪  
黑鷓鴣堰魂消鷓鴣洲何人吹玉笛腸斷木蘭舟

客中贈別

天涯芳草綠千里繫相思春到貧家晚寒消客館遲鶯  
曉殘月夜人去落梅時南浦垂垂柳傷心折一枝

憶楊樂山

輔仁

我友楊風子風流冠白門江山名跡重壇坫布衣尊冷  
眼多違俗窮塗怕受恩六朝金粉地天遠易銷魂

卽日山館卽事

山色被寒碧園林野氣清閒階添落葉老屋聚秋聲岑  
寂得幽趣疎狂無世情抱琴時獨立當戶一峰明

舟泊青漪湖

萬頃琉璃闊空明浸碧天水聲青嶂外帆影白鷗邊菱  
茨多無主魚鰕不論錢煙波真樂國好繫米家船

野菊

廢苑寒叢一徑荒  
疎枝慙亂飽風霜  
斜陽欲下瘦孤影  
野客獨來聞冷香  
晚節何心慕榮曜  
幽懷無夢到羲皇  
由來地癖甘遲暮  
搖落天教避衆芳

有感寄薛衍齋

謙

上舍

閒中無計慰情貧  
琴劍飄零負好春  
綺歲才華銷月露  
壯心慷慨逐風塵  
疎狂不礙爲名士  
通脫方能到古人  
落落千秋豪氣在  
未應窮老著書身

書懷

豪氣年來已漸平  
學書學劍總難成  
文章有力排憂患  
婚宦無情累死生  
悵望千秋雙眼在  
週迴五嶽一身輕

待蘭軒存稿

卷之上

十一

男兒羞爲科名重翻悔名山業未成

米珠薪桂費支持人海茫茫未有期  
一口重添京國累一官貧過秀才時  
頭銜笑我逢時拙手板隨人畫諾遲  
意外升沈俱不問破愁無計且吟詩

題吳門郊友梅

枚

黃花紀夢圖

紅豆相思負好春晚香與汝淡傳  
神幽懷寫入閒情賦只把黃花當美人

春遊棲霞山下野人留飲

晴翠滿春野幽澗多繁花尋芳意未倦  
信步來田家酌酒坐花外南山當戶  
遮嵐影淡如畫浮綠生檐牙對此

幽興足白日忘西斜導我自厓返獨步臨水涯極目送  
飛鳥天際明孤霞

題李太夫人寒燈課子圖

荒厨連日斷朝餐辛苦丸熊亦大難記得書聲刀尺裏  
破樓風雨一燈寒

溫飽無心定可知凌雲人到鳳皇池料應綠酒紅鐙夜  
未忘寒齋劃粥時

寄家惜庵

我昔讀元書頗愛玉山子宴賞極高風賓客如流水不  
仕傲王侯清操美前史千載念斯人湖洞不能已豈知



賢哲生近復在吾里吾鄉本陋區絃誦無人理名賢肯  
寄居提唱實可喜南面擁書城性復愛文士辛苦訪遺  
編校讐付文梓天下有心人好尚每如此我雖未見公  
中心切仰止淪落困清曹此事無能爾望公如古賢金  
粟無專美他日挂冠回從公訂知己

題家惜庵刊布高密李卓然先生蠹言卷

兩村直腐儒鮑氏一鹽賈爲愛刻奇書海內其稱許其  
書雜以繁菅麻亂綦組雖足廣見聞與道究無補我幸  
讀蠹言醇粹多精語簡質爲子書微茫洞肺腑爲學有  
本根何患中無主吾宗有高賢抱道重鄒魯搜剔及微

言鑒別心良苦，名山有事業。塵俗不能阻，讀書不聞道。  
不如農與圃，貧富各相忘。道義樂相取，充此闡幽心。耿  
耿照千古。

宿秦淮水榭夢中得西風寒塘之句因足成之

楊柳蕭疎畫舫稀，湖痕青上釣魚磯。西風影落寒塘裏，  
冷煞秋江浣女衣。

經送別處

記得春前送畫橈，離心空繫柳千條。重來又到消魂處，  
流水斜陽舊板橋。

春曉湖上泛舟

長隄垂柳碧於煙春雨河橋繫畫船兩岸紅樓齊貼水  
波痕綠到繡簾前

西嶼大珊瑚樹歌

臺灣澎湖西嶼島下生珊瑚樹數株高十餘丈  
有巨魚環繞其側若爲典守者然水色澄空清  
可見底計非鯨人莫能取也李參戎世標曾泊  
其地爲余言其異因作長歌

日華曜彩蟠蛟宮寶光遠燭搏桑紅天精地英毓奇氣  
重淵百丈飛晴虹根抵盤深極幽渺翹枝上出如遊龍  
造物若爲闕奇異雖有舟楫誰能通水色澄清見海底

海月秋空碧如洗騎鯨人去馮夷宮玉盤錯落珍珠蕊  
隱娥夜戲星潮明霞裳冷向瓊枝倚乖龍礪角生寒芒  
天風倏起迴瀾紫春回石蛙揚奇葩沿綠枝節明朱華  
萬年神蛤吐妖燄火虬文貝盤槎枒明珠厯亂綴星斗  
餘輝閃爍生明霞疑是媧皇煉餘石化成絳樹龍宮植  
驚波低拂釣鼇竿長風欲繫乘槎客圭角深藏氣已騰  
人間鐵網終難得潮聲澎湃如驚雷奔流落溆何時回  
蛟螭空復肆騰擲獨立未肯隨波頽橫洋南去遠無際  
流丹上燭飛蛇氣幽燐寒照髑髏沙星火夜明鸚鵡地  
乃知造化非無心仙根不使塵埃侵金谷富兒亦乞相

區區七尺猶驕淫我欲移根入月府  
婆娑桂樹爭翹楚  
白玉樓高足棟梁  
雕鏤好借吳剛斧  
不然植向蓬萊山  
琪花瑤草相追攀  
珠塵萬斛灑空際  
仙娥照耀明朱顏  
萬里風帆飛海舶  
波斯有眼何曾識  
極西空獻萬年枝  
日南徒貢通香木  
世人玩好逞奇衰  
雕蟲不足污刀尺  
材大無憂致用難  
神淵變化知何日  
狂夫好異兼好奇  
對此不覺生驚疑  
古來至寶不世出  
未妨抱璞猶遲遲  
等閑無復露光怪  
天意秘惜誰能知  
金烏曉沐出瀛海  
火輪正挂東南枝

弔宮人斜

阜城門外有淨樂園前明葬宮人處也  
又名宮人斜

黃塵漫漫吹寒空野花慘淡餘鶯紅鬼蜮迷人弄妖態  
蓬蒿滿地來悲風淒迷淨樂園前樹前朝舊葬宮人處  
金粉凋殘恨不銷愁魂慘結成香霧當時妙選盡良家  
玉臂纏綿繫絳紗芳印嬌紅鈿蜥蜴雲鬟新綠學宮鴉  
一樣蛾眉都望幸飛烟墮溷真無定承恩幾輩奉宸遊  
永巷空悲妾薄命薄命誰憐掌上身頻年金線壓殘春  
黃金無力嬌圖畫埋沒如花絕代人門楣恨少公卿貴  
花階粉箒無名位夢回愁聽上陽鐘妝成斜倚熏籠睡  
亦有名姬獻賦來歌成楚些有餘哀西風蕭瑟芙蓉冷  
金屋難藏絕代才內庭更設靈臺女步天列宿能周數

星河風露最淒涼迢遞牽牛傷獨處九重青醮慕神仙  
拜斗瑤壇夜不眠羽帔花冠衣繡甲空教身惹玉爐煙  
琳宮別啟焚脩地綠雲未忍從披荆獻佛時拈畢鉢羅  
繡經背誦蓮花偈刺繡深宮歲月深年年乞巧賜神鍼  
頻番織就葫蘆錦幾度分來豆葉金對食雙雙欣有伴  
銀苗菜合包兒飯也應羞作野鴛鴦漫向花前翻白浪  
紫鶴花開夜漸長戲邀女伴鬪寒蟬無端更起秋蟲社  
輸卻釵頭玉鳳皇四時最好中秋景廣寒宮殿嫦娥影  
君恩豈有月圓時懷中冷抱團圓餅祇候中宮更可憐  
添香測漏夜如年忽看盤水浮金箭向曉先擎一把蓮

女官紀過嚴官法官娥也受提鈴罰紅牆迴繞太平聲  
玉階冰透雙羅襪秋葉題成有濕痕看人歌舞到黃昏  
愁紅慘綠無生意辜負君王一顧恩花憔悴知難起  
安樂堂中暫移徙香銷古剎玉魚涼傷心甘向青春死  
長庚門啟玉棺封不信魂猶戀故宮爭及霜貓恩寵厚  
山陰題石葬虬龍深深塔井埋香骨生前不其君王入  
精衛含冤似海深多少嬋娟墳不足風雨無情掃落花  
千年遺恨玉鉤斜摧殘猶勝青霞女豔魄焚餘化彩霞  
幽燐隱約飛禪院晨鐘暮鼓愁魂斷秋墳鬼唱聽依稀  
聲聲似譜長門怨無緣陪葬附橋山悽切龍髯竟莫攀



望斷十三陵上草昌平風雨路漫漫

題家惜庵越思圖照

圖寫樓觀滄海日門對浙江潮景

先生腹中有東海萬頃滄茫無岸壘興酣走上望湖樓  
朝日搏桑射霞彩霞彩照耀千波紅天瓢倒瀉翻蛟宮  
紫鳳天吳弄光怪海天萬里何空濛知君胸次浩落落  
眼底浮雲淨掃卻江淮無地泛仙槎越人畢竟還思越  
聞君世業垂嘉興餘杭風物尤蒸蒸辭藻千秋重浙派  
文章氣節俱難能誰知襟抱最清遠生平爲學心難滿  
感懷萬古發幽情搜羅巖穴煙霞暖十載相思未識荆  
披圖覲面意何親斯文骨肉心相印我輩知交定有神

借遊五嶽論心跡問君婚嫁何時畢會當把臂上高樓  
長歌一笑海雲碧

過野寺

古寺臨秋水蕭條半掩扉寒藤穿屋長野鵲透窗飛香  
冷客初去日斜僧未歸無緣宿蘭若一爲扣禪機

寒夜至山莊

遠火出籬根寒郊夜色昏鴉嘯殘雪樹月墮野梅村細  
犬爭迎路疲驢自識門農夫欣我至扶杖倚茅垣

水村卽事

人家蘆荻外秋水漫孤村野鷺窺魚立寒鴉踏葉翻酒

香浮蕤底花晚卧離根隨意逢鄰叟猶堪倒一樽

蘆花和朱椒堂韻

空潭晴捲浪花鋪回首輝波客思孤秋水故人知宛在  
白頭游子得歸無西風先到停雲館南鴈重尋踏雪圖  
澤國荒寒愁歲晚扁舟有夢落江湖

潯陽曾記送歸船影混涼波客未眠別浦秋容迷曉霧  
隔江寒色指吟鞭繁霜有恨人千里流水無聲月半川  
襍被最憐輕絮薄天涯相憶惜華年

有客江頭別緒紛閑花幽草恨平分淒迷詩思尋荒渚  
搖落秋心抱冷雲華髮頻添應念我白衣垂老獨憐君

美人歲歲傷遲暮惆悵寒潭又夕曛

風景年來漸覺非冷官心事詔漁磯潛蹤窮士猶相戀  
抱影聞鷗凍不飛野水秋寒應共潔白雲天遠欲何依  
清襟坐對差無愧未使淄塵染素衣

憶揚州舊遊

幾度平山蕩畫橈小秦淮水送香潮鶯藏綠野花千樹  
路繞紅亭月半橋第五泉邊春試茗無雙閣下夜吹簫  
舊遊回首真如夢金粉南塘久寂寥

待蘭軒存稿卷之上終

待蘭軒存稿卷之下

沈陽王欽霖慈雨著 鴛湖王 相惜庵輯

送戴湘圃修撰視學秦中

手排紫氣下蓬萊  
曉日關門四扇開  
東觀瓊筵看奪席  
西都金馬冀程材  
三花嶽色盤胸起  
九折河源入抱來  
韋曲杜陵今寂寞  
山川有待不凡才

贈燕海樓

鮑

棖觸千秋恨文章  
豔可哀窮愁磨銳氣  
庸福靳奇才慷慨  
餘霜劔淒涼到酒杯  
高吟誰共賞長嘯上燕臺

懷吳心筠

廣德

同年

不見延陵季於今又五年相思生白髮潦倒困青氈豪  
氣固應在壯心空自憐昨宵猶入夢風雨對牀眠

寒夜宿梅岡別墅

月冷竹西屋小窗燈火深地爐寒煮雪紙帳醉眠琴孤  
鶴警清夢老梅留素心空山歲云暮把卷獨沈吟

四十初度有感

韶華苦難駐前路尙茫茫殊未覺年少居然成老蒼閑  
官忙歲月冷眼熱心腸學道知何用新驚鬢有霜

贈燕海樓

壯心摧末路事業竟蹉跎爲客形容瘦依人感慨多詩

工妨命蹇酒薄奈愁何萬里家山遠年年負薜蘿

秋日寄江上友人

渺渺雲山眼倦開  
慙慙愁病卧高齋  
重陽節近黃花晚  
細雨聲寒白雁來  
孤館暮煙垂橘柚  
碧天秋水隔樓臺  
故人不負登高約  
遲我柴桑共酒杯

秋晚送楊樂山南歸

斜陽忽西匿班馬去難停  
野水暮猶白遠山秋更青  
天涯隔衰草花外有長亭  
瑟瑟悲風起驪歌未忍聽

寄顧秋碧

六代風流歇斯人抱古懷  
張融殊坦率庾信善悲哀  
天



地容狂客山川老霸才何時醉明月同上鳳凰臺

登盤山石閣

石閣俛天外登臨衣袂寒幽禽下孤壑空翠溼煙巒雲  
氣白連屋磬聲青滿山何緣結茅屋坐卧高松間

秋郊晚眺

野色到吟邊蒼茫望遠天殘陽留薄暝孤恨入秋煙客  
去黃花後霜來白雁前故園今夜月只在異鄉圓

過董徵士山居

結茅人境外家住翠微間孤鶴依高樹閒雲戀故山石  
橋秋蘚滑谿路野花殘送我臨厓返松聲半嶺寒

漁陽旅夜

遼海青天月，羈愁獨夜看。  
歸心隨去雁，遠夢鎖重關。  
秋氣橫邊老，霜威壓屋寒。  
客中仍作客，幾度望長安。

遊九華山過石屋道人幽居

蘿薜隔人境，山花飛滿庭。  
琴聲送流水，嵐影枕危亭。  
野竹穿雲碧，寒藤絡石青。  
空岩坐岑寂，風雨晝冥冥。

秋日山居

抱琴偃蹇卧前軒，昨夜新霜已滿園。  
葉脫秋聲猶在樹，日斜峰影忽當門。  
書遲鴻雁天邊信，人隔蒹葭水上村。  
誰念空山最清寂，黃花相對淡無言。

寄魯季連 一同 同年

海上才人魯季連，風流文采自翩翩。  
詩懷靜極如幽女，俠骨生來似野仙。  
何以報君青玉案，幾時寄我白雲篇。  
思量舊約空回首，夜雨秋燈共被眠。

月夜同宋徵君

學濂

徐山人

元潔

攜湘煙校書後

湖觀蓮

露冷紅蕖豔，早秋畫船簫鼓去。  
芳洲美人嬌與月同色，高士靜如雲不流。  
清淺銀河橫碧落，蕭疎簾幕隔紅樓。  
風前一曲歌蓮子，豔說盧家有莫愁。

題隨園詩集

才氣真堪橫九州詩人已自足千秋一生豔福羣花笑  
百歲閒情古佛愁不礙文章誇佚麗偶傷輕薄是風流  
蚍蜉撼樹成何益好句雞林誦未休

擬杜少陵諸將五首卽用原韻

聞道單于據北山六師重度玉門關

天兵出自雲霄上飛將來從士卒問報

國正愁名滅沒濡輪何歎血朱殷男兒辜負

君恩重坐擁軍符亦汗顏

善後何人擬築城關山險處列危旌方聞頡利新輸款  
豈料花門又弄兵虎豹深叢懸不測腥羶餘孽掃難清

儒生敢上朱崖對終恃

宸謨奏蕩平

絡繹軍臺繞賊烽  
雪山關塞阻千重  
貳師弛縱終貽禍  
突厥猖狂未受封  
兵力豈煩回紇助  
軍儲還待鄼侯供  
防邊早下屯田議  
知道軍行未病農

拔幟何人敢奪標  
欃槍橫掃賊氛消  
邊陲要使知威信  
疆宇何嫌太濶寥  
馳馱頻年勞汗馬  
論功幾輩愧豐貂  
安全自是

朝廷福聞道呼韓擬入朝

萬里紅旗捷報來  
犬羊放命亦堪哀  
終看搏頰呼天罕

詎敢彎弓射帝臺，爰劔身還爲世僕。月支頭定作漉杯，安邊未必無長策。坐鎮原須大將才。

冬晚集陳子鶴寓齋作消寒會次雲麓前輩韻

名園小聚戀餘寒，老輩風流許共歡。雅宴未妨聯末座，辦香真欲拜吟壇。新詩有味如醇酒，清福能消是冷官。卻喜唱酬歸去晚，嚴城燈火夜初闌。

呈盧后山先生

萬里籌邊亦大難，奇才原足濟時艱。

帝將國計煩劉晏，天爲蒼生起謝安。東閣絲綸猶有待，西人心膽至今寒。始知將相文章貴，羞爲題名上紇干。

賀范蘭君新擢諫垣

星郎執戟去銓曹  
柏署新辭案牘勞  
吏部文章原赫奕  
臺官風骨更清高  
不鳴久笑排班馬  
守默應憐閉口椒  
海內爭先觀奏議  
看君珥筆上雲霄

題鄭雲麓前輩荆庭聚慶圖

八閩風雅一門收  
巨手堪修五鳳樓  
花萼文章同藻績  
竹林風雨共綢繆  
中年聚首懷君實  
四海浮家憶子由  
安得駢枝齊擢秀  
後先連步上瀛洲

春晚出城南看花

城南池館淨莓苔  
春盡閒曹冒雨來  
煙水有懷聊縱轡

園林無主自銜杯冷香入酒客微醉薄霧壓籬花半開  
爲愛晚晴緩歸去夕陽紅上好樓臺

呈那繹堂先生

家聲赫奕在常旂魁梧天人秉異姿潞國才原兼將相  
溫公名早動華夷龍門說士能增價虎帳談兵解握奇  
泰岳嵩高看坐鎮經綸不負

聖明時

屏藩作鎮衛京華絕域新迴使相車趙抃自攜琴作伴  
魏謨能保笏傳家三朝黼黻知無愧七葉金貂未足誇  
渤海風淳遺澤在蒼生頰首祝宣麻



名媛詩歸 卷之十一  
早春放舟至湖

春波一碧淨琉璃  
煙雨空江引棹遲  
十里寒香吹不斷  
梅花開過水仙祠

夜泊湖上觀梅

西溪雲冷月微斜  
夜泊前灘處士家  
殘雪半消遊客去  
獨留孤鶴伴梅花

湖隄晚步

苔痕綠上釣魚磯  
風輭湖亭柳絮飛  
春水橋西紅不定  
夕陽花外一船歸

冬夜飲酒有懷惜庵

王郎好酒兼好詩性情懶散殊自知撐腸萬卷苦無用  
讀書不化學書癡一官聊復挂朝籍未妨吏隱同棲遲  
生平頗覺淡榮利煙霞性癖真難移折腰從不謁朝貴  
羽流墨客相追隨吟成磊落亦自壯無由一吐胸中奇  
杯中有物幸相愛醉鄉許我稱雄師一日不醉意不快  
中懷鬱塞如囚羈興酣萬古發悲感欲澆傀儡飛千危  
愁向青天問明月蓬萊有路迴風吹埋憂無地唾壺碎  
白駒飛箭東西馳生不千秋亦何補蜉蝣碌碌真無幾  
此心耿耿每自惜恐隨草木同離披對酒無端發三嘆  
漫操流水懷鍾期名山事業有君在恃以自壯心無疑

良朋豈必在謀面神交一室長相思南來鴻雁有書至  
歲寒結契無相遺

己丑嘉平十九日集鄭雲麓前輩寓齋爲東坡先

生作生日

東坡居士人中仙排雲早下峨眉巔謫世六十有六載  
魂歸紫府今千年公生景祐歲丙子磨蝎命宮憂患始  
奇士足干造物忌南遷人已咒公死豈知賢者皆神明  
至今豪氣猶如生黨碑詩案構羣小皎然何足污公名  
生平大節惟忠愛偶藉文詞發光怪仙根猶現七星紋  
佛慧未忘五祖戒浮生歲月遷流中每逢覽揆尤匆匆

曾記黃州作生日扁舟歌嘯凌長風奇才安有庸庸福  
買田陽羨知何日富貴徒傷春夢婆神仙在笑秋風客  
公年廿六登制科一生宦跡真坎坷貫耳空聞有壽骨  
養生著論愁蹉跎晚年襟度尤蕭散健步何須鐵拄杖  
白首天涯憶卯君營成壽穴期同葬後來尸祝多騷人  
酸鹹嗜好庸非真罩谿已亡穀人死只今誰與歌生辰  
閒曹歲晚呼僚友瓣香更爲先生壽寶瓊親盛臘八羹  
玉椀滿浮眞一酒先生性不喜熱官應憐我輩俱清寒  
騷壇有靈或來享相與唱和敦古歡如公自有長生訣  
奎光夜照天東角酒酣橫笛任歌呼爲公重奏西飛鶴

經五國城弔宋二帝

奉春殿下土牛碎狐狸走上御牀睡勾芒有淚哭蒼生  
荒亡坐見金湯潰城郭蒼涼古汴京輔草失計撤藩屏  
敗盟未復三州地耀武徒陳六甲兵神霄良嶽空悽楚  
南朝錦繡誇何許秋風詩已識黃花果然金帝來爲主  
風雨青城劇可哀淒迷龍馭不歸來並桃冠子拋家鬢  
妖服何年起禍胎國亡海內猶全勝普天疾首同憂憤  
大仇誰復問夫差千秋莫洗中原恨北望龍堆盡族行  
茫茫天水碧無情蛾眉總墮刀兵劫馬上琵琶有怨聲  
帝姬都擅傾城目尤誇景福兼柔福瓊枝憔悴委風沙

臙脂冷落無顏色北來戎馬惜倥傯襤褸衣裳雨雪中  
拘管先投鴻翼府棲遲聊伴鴿王宮倉皇二后悲先逝  
匆匆稿葬形難蔽周旋欣逢蓋大王保護深憐阿計替  
足繭千山苦未休雲州遷徙又均州邊關幾處勞安置  
五國荒城當首邱宣和往事無人省夢華有錄餘悲哽  
豔情猶念李師師小詞解賦梅花引密語私傳有故嬾  
偷將果餌餽良辰安妃何幸先朝露未作腥羶帳裏人  
萬里投荒憐異俗病來藥餌知何物消渴難求野忠茶  
殘生忍進夫雲木泥馬傳聞渡建康幾時諸將復河湟  
南飛鴻雁無消息鸚鵡猶能問上皇紫塞誰持蘇武節

甘旨雖遺難下咽年年十月卧冰霜那須重說天甯節  
名將徒誇二勝環可能生入玉門關石坑痛未收遺骨  
南使虛迎旅櫬還人天幾世留餘孽貫胸慘墮尸陀劫  
帝子頻消雪窟魂孤臣白灑冰天血少帝從茲更北遷  
隻身飄泊最堪憐無端故老逢元夜話到興京意黯然  
瓊樓玉宇嗟何處天涯總是傷心路那堪重遇女王孫  
橫吹羌笛將愁訴忽聞恩赦到沙場妙選宗姬號玉箱  
生時杆兆金妃異姊妹花殘一夜霜客中幾度經寒熱  
出遊偶幸逢偷節曲中愁聽柳耆卿鄉心惆悵南天月  
手足傷情惜九哥稱臣俛首議連和當時惟恐中原復

竟把錢塘作汴河英雄奮欲將旗鼓廟謨終爲奸權阻  
使臣空渡白狼河將軍不到黃龍府邪律相逢恨有餘  
亡遊亡宋直須與一般花石傾家國猶話名香與異珠  
顛連已是頭如雪暮年情況真悽絕竟從馬足喪餘生  
凶殘更甚牽機藥白草黃沙使客愁誰憐人老塞垣秋  
荷花桂子西湖景半壁江山足宴遊

遊古墳原尋唐代宮妃葬處

綠野春殘杜鵑哭棠梨花開紅簌簌殞宮風動紙灰寒  
餓鴟飛起攫殘肉此地嬪妃舊寢宮零星碑碣卧泥中  
草根埋玉深深處化作宮花寂寞紅唐家窈窕開金屋



妙選瓊枝人似玉蛾眉小劫幾滄桑桃根有恨留香骨  
玉顏春早怨寒鴉冷落青楓日又斜埋沒可憐人絕代  
茂陵寒食杜陵花貞觀盛德思賢主如花曾放三千女  
紛飛甘作野鴛鴦豔魂不化原頭土誰向華清試舞腰  
永新婉變念奴嬌淒涼白髮談天寶錦襪香寒怨未銷  
年年幽恨隨流水嬋娟甘向花前死泣別應憐鄭大家  
柔情最憶雲芳子玉悴花憔悴自傷一聲河滿淚千行  
琵琶訴出深宮怨地下春愁亦斷腸古苔綠瘦金釵折  
繁華往事都消歇今日悲風嘯白楊當年愁思題紅葉  
幾人隨輦侍君王歌管聲中樂未央一樣容華都慘淡

承恩何必羨昭陽金粟堆前耕縱橫寒嘶石馬秋風動  
誰看歌舞上陵來惟有墳前老翁仲玉匣珠襦歲月更  
漫持金枕締幽盟芳心宛轉終難死豔魄纏綿尙有情  
香泥碧草迷殘堞傷心何處尋金粉一杯麥飯更誰澆  
墓門猶似長門冷古道斜陽渭水濱淒迷玉骨化香塵  
澆愁灑徧樽中酒憑弔千秋薄命人

過白溝河弔宋張忠文公叔夜

汴梁城上野狐泣一代傷心天水碧驚看熒惑入南斗  
二帝匆匆下殿走公於是時爲總兵家國喪敗當隨行  
姜維奇計惜不中人心已去謀難成時窮乃可見寄節

丈夫只有心中血，懷烈千秋生氣存。睢陽牙齒常山舌，  
忽聞已過宋界矣。白溝河北空流水，車中蹶起神揚揚。  
仰天大呼扼吭死，敗亡耻入敵人壘。生爲宋臣死宋鬼，  
馬革何從更裹尸。淒慘沙場骨空委，回首中原七百年。  
河流日夜鳴濺濺，古渡停車一憑弔。平原蒼莽生愁煙。

輓徐枳村先生

婦人醇酒感中年，賦到消魂亦可憐。識曲眼能空俗豔，  
論文心許得真詮。生前韓愈悲窮鬼，死後劉伶作醉僊。  
書卷數行遺墨在，一回展讀一潸然。

死別茫茫感不禁，風塵相許契尤深。文誇敝帚慙知己，

絃冷焦桐負賞音紫府我會驚噩夢黃泉誰與伴哀吟  
他年歸哭徐君墓冷落生平挂劍心  
客歲夢先生著道  
服謂紫府上聖命  
爲校文郎逾  
月而訃至

題陳雲伯詩集

宮體新裁秀可餐梅村以後此才難豔情未必輸長慶  
風骨居然似建安六代鶯花開浙派一門風雅照江干  
碧城十二青天遠辜負神仙作宰官

朝賀

海宇梯航萬國來中天景運喜重開八方風雨歸  
王會四塞河山擁

帝臺

盛世勲名高丙魏太平詞賦重鄒枚小臣愧乏明良頌  
也向

丹墀拜舞回

題徐文長遺集

賦罷哀猿只自傷文人遭際亦何常行多絕俗原非福  
才到能奇定不祥筆墨無心成怪醜風流有過近佯狂  
同時落魄唐衢在潦倒相逢淚萬行

涼水河閑眺

天光雲影極空明鷗鷺浮沉總不驚畢竟本源真洞澈

出山常似在山清

小飲桑家園遲查梅西不至

桑陰微雨喚唳鳩綠滿園林一逕幽好友不來春欲晚  
杏花紅上酒家樓

坐白雲道院

丹房人靜妙香生卧掩松關午夢清一縷茶煙涼不動  
隔花無語聽棋聲

遊仙謠

月府誰修白玉樓廣寒僊子亦多愁霓裳曲罷元霜冷  
聞說嫦娥已白頭

待蘭軒存稿

卷之下

贈范今雨 尚 大令

謫官原不損清名，橐筆何辭萬里行。  
鐵筴鬢絲餘雪影，玉關詩句帶秋聲。  
民心尙不忘朱邑，漢室終當召賈生。  
歸臥東山身未老，壯懷猶欲請長纓。

讀吳蘭雪香蘇山館詩

紅衫香雪思纏綿，潦倒名場負少年。  
豔福消來妨祿命，清才脩得到神仙。  
官閒合伴梅花隱，夢穩猶騎蛺蝶眠。  
老向蠻方作州去，弓衣好句繡南天。

先生有夢騎仙  
蝶看梅花圖

薄宦

薄宦心情百不如，浮沉人海笑迂疎。  
春衣盡典猶沽酒。

清俸無多尙買書  
標榜恥求元晏序  
寂寥誰伴子雲居  
輒紅塵外門常閉  
觴詠偏來長者車

讀黃仲則兩當軒詩集

悲豔眞堪泣鬼神  
情深語語見天真  
才能絕俗宜妨命  
詩到傷心易感人  
梁苑倦遊枚叔病  
茂陵長卧相如貧  
客中愁聽山陽笛  
淒切窮交淚滿巾

游玉將軍園林

碧山幽墅遠塵氛  
路繞林泉一徑分  
春氣潤花微有露  
柳煙籠水欲生雲  
樓臺日麗鶯初轉  
絃管風和酒半醺  
宴罷名園歸去晚  
留連芳草到斜曛



贈章大芝楣

萬卷縱橫到眼前，  
輒紅潦倒惜華年。  
奇書漫想傳千載，  
名士何曾直一錢。  
猶共少陵書酒券，  
羞隨伯玉碎琴絃。  
文章冷落黃金貴，  
賦罷長門只自憐。

題張鶴村菊隱圖

三逕荒寒自掃除，  
冷香叢裏閉門居。  
秋心淡到斜陽外，  
逸態橫生薄醉餘。  
車馬無聲塵寂寂，  
羲皇有夢醒蘧蘧。  
明朝送酒人來否，  
風雨高齋臥讀書。

寄陳鐵生

萬卷奇書放眼看，  
奇才只合老江干。  
學關經濟文章貴，

士解悲歌遇合難科第未容風漢占  
蓋鹽猶缺腐儒餐  
茫茫四海知音少  
挾瑟齊門莫漫彈

題湯海秋浮邱閣詩集

海內奇才湯海秋  
牢騷萬古動羈愁  
神絃縹緲雲中曲  
黃鶴高寒水上樓  
楚國山川餘霸氣  
詩人情性帶離憂  
英雄不幸工詞賦  
慷慨長吟已白頭

題黃樹齋詩草

仙格超凡雅望清  
天機洋溢見和平  
端人學術無旁鶩  
名世文章有正聲  
厚福足能消慷慨  
大才原不露聰明  
龍門一代存公論  
著作誰當此席爭

燕臺竹枝詞

鳳城楊柳蠶腰肢紫陌香銷細步遲知是迎春佳節近  
釵邊都插鬧蛾兒

西頂香車走不停花前幾輩鬪娉婷明朝更訂游春約  
螞蟻墳前去踏青

銅鉢聲聲乍解寒未妨消渴試香蘭芳心不惜清冰冷  
爲愛江梅一點酸

燕山春草碧如絲歲歲離人折柳枝自種一叢長十八  
明開夜合耐尋思

裙兜香土顫輕羅私祝娘娘密語多願與兒夫填缺陷

一年一度趕秋坡

花裏宮袍窈窕地長銀貂圍額貼鵝黃雙鸞依舊凌波瘦  
半學旗妝半漢妝

近來雲髻樣尤工時世梳妝白不同今日縮成雙鳳尾  
明朝更作大盤龍

暮暑熏蒸夏日長玉盤滿注碧雲漿水晶瓜與琉璃麩  
不及儂心一味涼

護國寺觀姚少師畫像

成祖之相如飛龍少師相乃類病虎虎龍變化際風雲  
荼毒忠良亦何苦尊寵當時稱國師要於佛法究無取

如來昔度哥利王戒殺先令棄刀斧奈何帷幄參密謀  
坐視凶殘不能阻但知懺悔媚空王鑄鐘建塔曾何補  
腰金服蟒亦堪嗤幾見黑衣居政府我聞少師初習儒  
歆豔富貴爲髡徒始意學佛亦非善禪宗何足窺真如  
嗟哦縱解弄筆墨機鋒箭括終麤疎風流徹骨讚何謬  
小乘已落聲聞餘入朝不肯改僧服我師用意誰能識  
爲僧位尙在賓師加冠未免受臣職黃金美女賜深宮  
卽以琳宮爲第宅登第雖然異浪仙吞鍼毋乃同羅什  
高皇列爵開藩封以僧爲傅滋奸凶無端白帽奉燕主  
陰謀煽惑成奇功患起椒聊勢蕃行禍延瓜蔓無終窮

燕啄皇孫毒未已讀書種子江南空危服還鄉脫金紫  
妄託前因受鞭箠爲僧不了豈端人無怪入門羞阿姊  
遺像何年留寺中雙眸光氣猶熊熊芭蕉拄杖雖看破  
豈能提唱開宗風佛如有知必非笑似此異類非吾宗  
香火何容奉禪室不如焚化無留蹤

和張芥航河督送銅鼓入焦山韻

我聞伏波將軍鑄銅鼓分布三十六種諸苗家南人歆  
血誓不反終漢之世無疵瑕餘威振蕩懾諸國風行眞  
臘兼瓜窪千年遺器出南詔月輪未蝕金蝦蟇牛尾細  
碎土花紫未須款識詞繁參曲江先生負眞賞摩挲老

眼猶無花靈物鬼神其呵護三代法物同矜誇卻愁變  
化發光怪海王欲奪蛟龍擊君不見金銅僊人墮鉛泪  
露盤無復承朱華又不見湛盧寶氣化爲虎劍池寂寞  
沈秋此過眼雲煙幻泡影古懷勃發徒咨嗟不如名山  
供老佛不愁山鬼相揄揶焦山東去海波濶海雲堂外  
雲週遮竹林寺古梵音絕鐘魚晝靜無喧譁周初寶鼎  
最奇古雷紋象象盤天斜我生好古乏眞賞眼光疑隔  
千重紗此鼓沈淪棄靈越千金價值無人加持配周鼎  
實相當有如千將借缺鄒當年鑄就跼鳶水震驚大鱗  
兼高牙雲韞金釵扣不絕木郎賽罷爭輿豨犵烏蠻花

幾變滅漁陽絕調留摻搥佛廬從此闕幽異不與銅柱  
留荒遐大聲應可發聾噴人間俗耳哀箏瑟我爲此鼓  
三嘆息空門閉置歸黎闍方今西域正蠢動貳師萬騎  
屯流沙跳梁雖已縛頡利馱經猶未迎僧伽安得援袍  
畀飛將旌旗天半明朱霞崑崙一鼓蕩羣醜雷霆夜震

青海涯



待蘭軒存稿卷之下終

慈雨吏部世居响陽東關壬午舉於鄉丙戌成進士任  
吏部主事性豪邁不羈喜藏書嗜吟詠與先子初未識  
面自都中走札二千里訂世外交嗣此楮墨往還無虛  
歲吏部以不可一世之概淪落銓曹往往縱酒頽放藉  
澆暑魄所爲詩俶詭靡曼疊疊動人宋元以來未易才  
也玉棺遽下隣笛增悲著作滿家此集乃其手訂寄質  
先子者亟付刊行俾後之人窺此一斑想見全豹云爾

愚姪王襲之謹識